

# Nova pagina d'internet da RTR

■ (cp) **A chaschun da sia davosa seduta è il Cussegl dal public SRG.R (CP SRG.R) s'occupà da la nova pagina d'internet [www.rtr.ch](http://www.rtr.ch). La nova pagina-web è vegnida publicada la primavera 2015. Il CP SRG.R ha er osservà la cumparsa e l'integraziun da visualisaziuns e graficas.** La realisaziun da quests elements che contribueschan bler a la chapientscha d'in tema è reussida cunzunt en l'emissiun Minisguard. Il CP SRG.R po s'imaginar bain che talas «parts explicativas» pudessan esser in enrigiment era per autras emissions.

## **Funcziunalitad e concepziun da la nova pagina d'internet da RTR**

La pagina d'internet [www.rtr.ch](http://www.rtr.ch) suonda il design da la pagina [www.srf.ch](http://www.srf.ch) da SRF Radio e Televisiun Svizra. Ins ha temì che RTR perdia forsia in pau da sia originalitad. Ma quai n'è betg il cas. La

nova pagina-web porscha fitg bleras infurmaziuns sco usità en ina qualitad fitg auta, persvada cun ina concepziun atractiva, è survesaivla e bain structurada. Ils problems da performanza han ins schlià cun la realisaziun da la nova pagina. L'archiv n'è anc betg vegnì migrà cumplettaimain, in pass ch'è previs per il proxim temp. Medemamain han ins empermess da schlargiar l'app existenta «Play RTR».

## **Dieta naziunala SRG SSR ils 25 da settember 2015 a Cuira**

La Dieta naziunala SRG SSR da l'onn passà ha gi lieu a Lucerna ed è s'occupada dal tema divertiment. Quest onn ha la dieta naziunala lieu ils 25 da settember 2015 a Cuira en l'auditori da la Banca Chantunala Grischuna. En il center vegn ad esser la contribuziun che la SRG SSR fa a la democrazia. Gist en in onn d'elecziuns èn las medias, ed en

spezial la SSR, plattafurmas impurtantas per las votantas ed ils votants. La Dieta naziunala è averta per tut ils commembers da la SSR e po vegnir frequentada gratuitamain. *Mariano Tschuor* organischa l'occurrenza che stat sut il motto «La contribuziun dal service public a la democrazia» per incumbensa da SRG.R. Cun *Martin Schulz* (president dal parlament da l'Uniun europeica), *Walter Thurnherr* (Datec) e *Sonia Mikich* (WDR) èn envidads referents interessants. *Isabella Wieland* (RTR) e *Casper Selg* (correspondent SRF Berlin) vegnan a moderar l'inscunter. Ulteriurs detagls suondan pli tard.

## **In sguard enavant**

A la proxima seduta il settember 2015 sa fatschenta il CP SRG.R cun ils rapports da RTR or dal cussegl grond dal chantun Grischun. Plinavant sa partecipescha ina cumissiun ad in'observa-

ziun communabla da tut ils cussegls dal public da la SSR. Ella prenda sut la marella la preinfurmaziun davart las elecziuns federalas dals 18 d'october 2015. L'observaziun cuminaivla duai promover e rinforzar la collavuraziun tranter las singulas regiuns linguisticas.

## **Infurmaziuns davart il Cussegl dal public SRG.R**

Il cussegl dal public è in gremi consultativ independent che accumpogna la lavur ed il svilup dals programs da RTR Radiotelevision Svizra Rumantscha cun constataziuns e propostas. Il cussegl dal public vegn ensemen per regola quatter giadas ad onn. El observa ina tschernia da programs, emissions e purchidas online da RTR. Il Cussegl dal public SRG.R tgira in stretg contact tranter las personas responsablas per ils programs ed il public. El sa cumpona da 15 commembers.